

Evening Dogri (NSD) News

01-August - 2026

खास खबरां

1. प्रधानमंत्री नरेन्द्र मोदी होरें अज्ज आंध्र प्रदेश ते-कर्नाटक दौरे दुरान 17 -ज्हार 900 करोड़ रुपे दिथें परियोजनाएं दा उदघाटन ते शिलान्यास कीता।
2. केन्द्र सरकार नै राज्यें गी इक लक्ख 9 ज्हार करोड़ रुपे दा बाद्दू टैक्स हस्तांतरण जारी कीता ऐ।
3. राश्ट्रीय सुरक्षा सलाहकार अजित डोभाल होरें गी प्रतिष्ठित लोकमान्य तिलक राश्ट्रीय पुरस्कार -2026 कन्नै सम्मानित कीता गेआ।
4. कुलगाम जिले च कल आतंकवादी हमले च घाऽल होए दे इक गैर-मकामी मजूर नै इलाज दौरान दम त्रोड़ी दिता ऐ।
5. कारोबारी LPG गैस सिलेंडर दे भाह च कोई 200 रुपे दी कमी कीती गेई ऐ।
6. भारती महिला मुक्केबाज प्रीति पवार ते जैसमीन लबोरिया नै ग्लासगो च आयोजित राश्ट्रमंडल खेड्डें च अपने-अपने वर्ग च सुन्ने दा तगमा जित्तेआ ऐ।
7. ते ताइपी ओपन बैडमिंटन चैम्पियनशिप च भारत दी तनवी शर्मा फाइनल च पुज्जी गेई ऐ।

<><><><><><>

PM Tour- Andhra

प्रधानमंत्री नरेन्द्र मोदी होरें अज्ज आंध्र-प्रदेश ते कर्नाटक दा दौरा कीता- जित्थे उ'नें 17 ज्हार 900 करोड़ रुपे कोला मते दिएं परियोजनाएं चा किश दा नींह पत्थर रखेआ ते केंइएं दा उदघाटन कीता। आंध्र-प्रदेश च प्रधानमंत्री होरें ढांचागत विकास, परती-पतियै बरती जाई सकने आहली ऊर्जा ते सड़क-सम्पर्क सरबन्धि केंई महत्वपूर्ण प्रोजैक्टें दी शुरुआत कीती। भोगपुरम च बने दे अल्लूरी सीताराम राजू अंतराश्ट्रीय ब्हाई अड्डे जेहड़ा जे इक ग्रीनफील्ड अंतराश्ट्रीय ब्हाई अड्डा ऐ दे पैसेन्जर टर्मिनल दा उदघाटन कीता। PPP मॉडल तैहत एहदे निर्माण पर 5 ज्हार 640 करोड़ रुपे दी लागत आई ऐ। मोदी होरें अज्ज इक ज्हार 880 करोड़ रुपे दी सड़क परियोजनाएं दा उदघाटन ते किश दा नींह पत्थर बी रखेआ। इंदे चा N.H. 365 B.G. तगर कन्नो-कन्नो 4 गड्डियें दे लंघने आहला ग्रीन फील्ड हाई-वे ते देवरा पल्लें रेचेरला बश्कार ग्रीनफील्ड दे NH-67 पर ताड़ी पत्री बायपास बी शामिल ऐ। मोदी होरें NH 565 दे पंचलाकोना-थेरपेड्डू डिवीजन पर लिंग समुद्रम च इक उच्चे पुलै दा नींह पत्थर बी रखेआ। एहदे इलावा उ'नें कुरनूल ते अनंतपुरम च पैदा होने आहली सौर ते पवन ऊर्जा गी राश्ट्रीय ग्रिड राएं पूरे मुल्ले च पुजाने लेई 4 ज्हार 370 करोड़ रुपे दी ट्रांसमिशन

प्रणालिएं दा बी उदघाटन कीता। तोंआई कर्नाटक दे दौरे दौरान मोदी होरें मैसूर दे ऐतिहासिक निरजंन मठ च बनाए गेदे स्वामी विवेकानंद संस्कृतिक युवा केन्द्र “विवेक स्मारक” दा उदघाटन कीता। एह स्मारक स्वामी विवेकानंद हुंदी 1892 दी ऐतिहासिक मैसूर यात्रा दे चेते च बनाया गेआ ऐ। इस दौरे दौरान उ’नें इक जनसभा गी बी सम्बोधित कीता ते आखेआ कि केन्द्र सरकार आधुनिक ढांचा, हरति ऊर्जा ते सड़क सम्पर्क गी बढ़ावा देइयै क्षेत्रीय विकास गी नमीं रफ्तार देआ रदी ऐ।

<><><><><><>

Centre –State Instalment

केन्द्र सरकार नै राज्यें गी इक लक्ख 9 ज्हार करोड़ रपे टैक्स हस्तांतरण जारी कीता ऐ। केन्द्री खजाना मंत्रालय आसेआ अज्ज पैहली अगस्त गी जारी एह रकम इक बाददू किशत ऐ जेहदा उद्देश्य राज्यें दी माली स्थिति गी निगगर बनाने ते विकास कम्में ते बुनियादी च सुधार आहन्ना ऐ। एह रकम 10 अगस्त 2026 गी थोने आहले महावार टैक्स हिस्सें कोला बक्खरी ते बाददू ऐ। सब्भनें शा मता हिस्सा हासल करने आहलें 5 राज्यें च उत्तर प्रदेश सब्भनें शा मता 19 ज्हार 208 करोड़, बिहार 10 ज्हार 845 करोड़, मध्य प्रदेश 8 ज्हार 10 करोड़, पच्छिम बंगाल 7 ज्हार 866 करोड़ ते महाराष्ट्र 7 ज्हार 22 करोड़ शामिल ना। वित्त आयोग दिएं सफारशे दे मताबक केन्द्र सरकार अपने टैक्स कलैक्शन दा 41 प्रतिशत हिस्सा राज्यें च तकसीम करदी ऐ जेहड़ा आम तौर पर इक माली बरे च 14 किशते च दिता जंदा ऐ।

<><><><><><>

GST Collections

पिच्छले म्हीने वस्तु ते सेवा कर (GST) संग्रह च उल्लेखनीय बाढ़ा दर्ज कीता गेआ ऐ ते एह 2 लक्ख 11 ज्हार 205 करोड़ रुपें तगर पुज्जी गेआ। एह जुलाई 2025 च इक लक्ख 83 ज्हार 65 करोड़ रुपें दे मुकाबले 15 इशारिया 4 फीसद दी सलाना बाढ़े गी दर्शांदा ऐ। वित्त मंत्रालय आस्सेआ जारी आंकड़े मुजब, सकल घरेलू GST राजस्व इक लक्ख 44 ज्हार 695 करोड़ रपे रेआ। एह इक बरे पैहले दे मुकाबले 10 इशारिया इक फीसद मता ऐ।

<><><><><><>

S. Jaishankar

विदेश मंत्री डाक्टर एस.जयशंकर होरें कल शामी ईरान दे विदेश मंत्री अब्बास अराघची हुंदे'नै फोन पर गल्लबात कीती ते पच्छिम एशिया च जारी तनोतनी आहली स्थिति पर चिंता प्रगट कीती। डाक्टर जयशंकर होरें उन्दे नै गल्लबात दौरान आखेआ जे कुसै बी परिस्थिति च कारोबारी ज्हाजें पर कुसै बी धडे आसेआ हमले नेंई कीते जाने लोडचदे ते इस गल्लै गी पक्के तौरा पर जकीनी बनाया जा। उ'नें आखेआ जे कि भारत कुसै बी पक्ख आसेआ इस चाल्ली दे हमले कीते जाने दी सख्त निंदेया करदा ऐ। इक सोशल मीडिया पोस्ट पर जयशंकर होरें दस्सेआ जे जारी घटनाक्रम ते चर्चाएं दे सरबंध्यै च उ'नें ईरान गी भारत दे रौंS बारे दस्सेआ ते आखेआ कि भारत सदा गै गल्लबात ते कूटनीति राएं हर समस्या दा हल्ल करने दे हिमायती रेहा ऐ ते भविक्ख च बी रौहगा।

<><><><><><>

Ajit Doval

राश्ट्रीय सुरक्षा सलाहकार अजित डोभाल होरें'गी अज्ज पुणे च प्रतिष्ठित लोकमान्य तिलक राश्ट्रीय पुरस्कार 2026 कन्नै सम्मानित कीता गेआ। केन्द्री गृहमंत्री अमित शाह होरें मुख्ख परौहने दे रुपै च तिलक स्मारक ट्रस्ट दी तरफा उनें'गी एह पुरस्कार भेंट कीता। एह सम्मान उनें'गी देश दी राश्ट्रीय सुरक्षा, आतंकवाद रोधी अभियानें जियां आप्रेशन ब्लैक थंडर ते सीमा सुरक्षा च उन्दे गैर-ममूली योगदान लेई दिता गेआ ऐ। इस सम्मान दे तैहत इक स्मृति चिन्ह, इक प्रशस्ती पत्र, गीता रहस्य दी इक कॉपी ते इक लक्ख रुपे दा नकद इनाम बी दिता जंदा ऐ। एह सम्मान महान स्वतंत्रता सेनानी लोकमान्य बाल गंगाधर तिलक हुंदी 106मीं बरसी दे मौके पर आयोजित इस समारोह दौरान दिता गेआ।

<><><><><><>

Terror Attack Kulgam

कुलगाम जिले च कल आतंकवादी हमले च ज़ख्मी होए दे दुए गैर-मकामी श्रमिक ने बी इलाज दुरान दम त्रोड़ी दिता ऐ। उसी नेडे दे इक अस्पताल च शुरुआती इलाज दे मगरा सरकारी मैडिकल कालेज अनंतनाग च मुतकिल कीता गेदा हा। मुख्खमंत्री उमर अब्दुल्ला होरें गैर-मकामी श्रमिकें पर कीते गेदे इस हमले दी सख्त निंदेआ करदे होई कीमती मनुक्खी जाने दे नुक्सान पर दुक्ख जताया ऐ। उ'नें मारे गेदे दे, परोआरें लेई मुख्खमंत्री राहत कोश थमां 10-10 लक्ख रुपें दी सींधी सहायता दा ऐलान कीता ऐ। एहदे इलावा जिला प्रशासन आसेआ बी प्रभावत परोआरें गी 6-6 लक्ख रुपेआ दिता जाहगा।

<><><><><><>

LG- Security Review

लैफ्टिनेंट गवर्नर मनोज सिन्हा होरें अज्ज इक उच्ची सतह दी सुरक्षा समीक्षा बैठक लाइयै डिप्टी कमीशनरें ते SSPएं गी निर्देश दिते जे ओह बाहरले राज्यें थमां जम्मू-कश्मीर च आए दे मजूरें-कम्मगारें दी सुरक्षा लेई मानक संचालन प्रक्रियाएं दा जायजा लैन। उ'नें नेह मजूरें गी कम्मै पर रक्खने आहलें गी हुक्म रसाल कीता ऐ जे ओह कम्मगारें दी बीमा कवरेज जकीनी बनान ते उन्दे ब्यौरे मकामी पुलस ते जिला प्रशासनें कश दर्ज बी करोआन। एल.जी होरें आखेआ जे आतंकवादियें दे सफाए लेई सुरक्षाबलें दे अभियानें च होर तेजी आहन्नी जानी लोडचदी ऐ। उ'नें प्रशासन गी निर्देश दिता जे कुलगाम आतंकी हमले दरान मारे गेदे श्रमिकें दे सम्मान-जनक ढंग्गै कन्नै खीरी संस्कार ते सोगी परोआरें गी हर मुमकन मदाद जकीनी बनाई जा। इस मौके पर एल.जी होरें श्री अमरनाथ जात्तरा लेई सुरक्षा प्रबंधें दी बी समीक्षा कीती।

<><><><><><>

SIR Telangana

भारतीय चुना आयोग नै तेलंगाना च मतदाता सूचिएं दी नमें सिरेआ तफसीली नजरसानी दे कार्यक्रम च बदलाव करी दिता ऐ जेहदे तैहत हून खीरी मतदाता सूचि 19 अक्तूबर गी जारी कीती जाग। सियासी पार्टियें दी मंग ते कम्मै दी समीक्षा दे बाद चुना आयोग नै एह बदलाव कीता ऐ। नमें तरमीम कीते गेदे कार्यक्रम दे मताबक घर-घर जाइयै गिनत्री ते फार्म जमा करने दी खीरी तरीक 3 अगस्त दी थाहर हून 10 अगस्त करी दिती गेई ऐ। मतदान केन्द्रें दे पुर्नगठन दा कम्म बी 10 अगस्त तगर गै पूरा करना होग। मतदाता सूचिएं दा मसौदा 17 अगस्त गी प्रकाशत कीता जाहग। दावे ते ऐतराज 17 अगस्त कोला 16 सितम्बर दे बश्कार जमा कराने होग ते इंदा नबेड़ा 17 अगस्त सवा 15 अक्तूबर दे दरमयान पूरा कीता जाहग ते खीरी सूचि 19 अक्तूबर 2026 गी तयार कीती जाहग।

<><><><><><>

EC –Odisha

ओडिशा च चलै करदी मतदाता सूचिएं दी नमें सिरेया तफसीली नजरसानी दे कार्यक्रम च बदलाव करदे होई एहदी समें-सीमा गी अगड़े बदाई दिता ऐ। दावे ते ऐतराज दर्ज कराने दी खीरी तरीक 4 अगस्त कोला बधाइयै 19 अगस्त करी दिती गेई ऐ ते नोटस जारी करने, दरखास्ते दी जांच ते ऐतराजे दा नबेड़ा 17 सितम्बर धोड़ी पूरा करी लैता जाहग ते खीरी मतदाता सूचि हून 6 सितम्बर दे बजाए 21 सितम्बर गी जारी कीती जाहग।

MOS Projects

केन्द्री मंत्री डाक्टर जितेन्द्र सिंह होरें जम्मू-कश्मीर च राष्ट्री जरनैली सिङ्क-244 पर सुद्धमहादेव-दरंगा ते सिंगपोरा-वाईलू सुरंग परियोजनाएं गी केन्द्री मंत्रिमंडल आसेआ मंजूरी देने लेई प्रधानमंत्री नरेन्द्र मोदी हुंदा आभार प्रगट कीता ऐ। तकरीबन 9 ज्हार 800 करोड़ रपे मुल्लै दिएं इनें परियोजनाएं दा मकसद चिनाब खित्ते धोड़ी पुज्ज च सुधार करदे होई जम्मू ते कश्मीर घाटी बश्कार हर मौसम च सम्पर्क जकीनी बनाना ऐ। डाक्टर सिंह होरें आखेआ ऐ जे इनें सुरंगें दे कन्नै उधमपुर-डोडा-किश्तवाड़-रामबन ते समूलचे केन्द्र शासत प्रदेश च सिङ्क सुरक्षा च बाद्दा- जात्तरा-समें च कमी- आपदा शा बचाऽ आले ढांचै गी 山मज़बूती ते आर्थिक विकास, सैलसफा, बपार ते रोज़गार दे मौकें च बाद्दा बी जकीनी बनाग।

<><><><><><>

Comm LPG Prices

तेल विपणन कम्पनियें ने अज्ज 19 किलोग्राम आहले वाणिज्यिक LPG सिलेंडर दी कीमत च लगभग 200 रपे घट्ट करी दिती ऐ। कटौती दे मगरा दिल्ली च वाणिज्यिक सिलेंडर दी कीमत 2 ज्हार 738 रपे होई गेई ऐ। कोलकाता च 2 ज्हार 872 रपे 50 पैहे, मुम्बई च 2 ज्हार 691 रपे 50 पैहे ते चेन्नै च 2 ज्हार 906 रपे होई गेई ऐ। Indiaan Oil Corporation Ltd. दे मुताबक, वाणिज्यिक सिलेंडर दी नमीं कीमतां अज्जै शा लागू होई गेइयां न। इस फैसले कन्नै रस्टोरेंट, ढाबे, होटल ते खाने-पीने आहले कारोबार कन्नै जुड़े दे लोकें गी राहत थ्होग।

<><><><><><>

India-China Trade

सिक्किम च नाथु ला दरें शा भारत ते चीन बश्कार बन्ने पार बपार अज्ज कोला फही शुरु होई गेआ ऐ। एहदे कन्नै 6 बरे शा ज्यादा समें कोला चला रदा बपार निलंबन समाप्त होई गेआ ऐ। बपार दा परतियै शुरु होना भारत ते चीन बश्कार आपसी सरबंधें च इक सकारात्मक संकेत ऐ। साहूदे संवाददाता दी रिपोर्ट मुजब, अज्ज बड्डलै भारत ते चीन दे अधिकारी “No Man's Land” पर मिले। चीनी पक्ख दी अगुआई तिब्बत स्वायत्त क्षेत्र दे प्रशासनिक प्रमुख ने कीती, जेहदे च उन्दे बंज ते बन्नै आहले बपार विभागें दे प्रतिनिधि बी शामिल हे।

<><><><><><>

IMD-Weather

मौसम विभाग नै आखेआ ऐ जे दक्खन पच्छमी मानसून दे दुए अहै च बरखा सामान्य कोला घट्ट रौहने दी मेद ऐ। मैहकमे दा आखना ऐ जे इस महीने एह बरखा केई बरे थमां चलदी आवा'रदी औसत दे 94 प्रतिशत कोला बी हेठ रौहने आहली ऐ।

<><><><><><>

Rainfall -Kerlam

समूलचे केरलम च जंदी रातीं थमां लग्गी दी जबरदस्त झड़ी कारण केई सारे इलाकें च पस्सियां पौने ते इलाके च पानी किट्टा होने कारण आम-जनजीवन बुरी चाल्ली प्रभावत होए दा ऐ। मौसम विभाग नै अगले 24 घंटे लेई 9 जिलें च रेड अलर्ट ते 5 जिलें च ऑरेंज अलर्ट जारी कीते दा ऐ। कोटययम ते इडुक्की जिलें थमां 4 लोकें दी मौत दी बी खबर ऐ।

<><><><><><>

Highway

उधमपुर जिले च समरोली थाहर देवल पुलै दे नेडे मरम्मती सुधार आले कम्में गी तोढ चाढने परैन्त जम्मू-श्रीनगर राश्ट्री जरनैली सिङ्क गी गड्डियें दी आओ-जाई लेई परतियै खोली दिता गेआ ऐ। साढे जिला संवाददाता दी रिपोर्ट मूजब, जरनैली सिङ्कै दे प्रभावत होए दे हिस्से पर जारी मरम्मती आले कम्में गी सबूरा कीते जाने मगरा ट्रैफिक परतियै ब्हाल होई गेआ ऐ। जात्तरिएं, ट्रांसपोर्टरें ते होरनें लोकें गी बी जरनैली सिङ्क ब्हाल होने पर बड़ी मती राहत हासल होई ऐ। ऊआं प्रशासन नै मोटर-गड्डियां चलाने आहलें गी सलाह दिती ऐ जे ओह एहतियात बरतन ते ट्रैफिक मत्तल्लक हिदायतें दी पालमा जकीनी बनान।

<><><><><><>

Floods Odisha

ओडिशा च महानदी दरेया च पानी दा स्तर बधने कन्नै हाड़ दी स्थिति गंभीर बनी दी ऐ। हेठले इलाकें च केई जिलें च हाड़ दा खतरा बधा रदा ऐ। मुख्मन्त्री मोहन चरण मांझी होरें अज्ज हाड़ प्रभावत क्षेत्रें दा ब्हाई सर्वेक्षण करिए स्थिति ते राहत कम्में दी समीक्षा कीती। तोंआई, मौसम विभाग ने होर मती बरखा पौने दी संभावना दस्सी ऐ, एहदे कन्नै प्रशासन पूरी चाल्ली सौहगा-सर्तक ऐ।

<><><><><><>

Common Wealth

ग्लासगो च आयोजित राष्ट्रमंडल खेड्ड 2026 च अज्ज भारती महिला मुक्केबाजें इतिहास रचदे होई 2 सुन्ने दे तगमे हासल कीते। प्रीति पवार ते जैसमीन लबोरिया दौने अपने-अपने वर्ग च जबरदस्त दब-दबा बनांदे होई फाइनल मकाबले च इक तरफा जित्त हासल करदे होई सुन्ने दा तगमे जित्ते। प्रीति ने महिलाएं दे 54 किलोग्राम वर्ग च जिसलै कि जैसमीन नै 57 किलोग्राम वर्ग च एह मकाबले, दौने मुक्केबाजे अपने-अपने मकाबले 5-0 कन्नै जित्ते।

<><><><><><>

Open Badminton

ताईबी ओपन बैडमिंटन चैम्पियनशिप च भारत दी तनवी शर्मा अज्ज सेमीफाइनल च चीनी ताईपी दी हुआन यू हसुन गी 21-17, 21 -11 दे सैट्टें च रहाइयै फाइनल च पुज्जी गई ऐ। 17एं बरे दी तनवी शर्मा दा अगला मकाबला जेहड़ा जे इस चैम्पियनशिप दा खताबी मकाबला होग दुनिया दी 21मीं नम्बरै दी खडारन वियतनाम दी थुए लिन-न्गुपेन कन्नै होग। एह मकाबला कल 2 अगस्त गी भारतीय समें दे मताबक बड्डलै साड्डे 7 बजे होग।

<><><><><><>